

# TAOLENNOU AR MISSION

DISPLEGET

Gand ann Aotrou BALANT, Beleg.



Tous droits réservés.

KEMPER

MOULLET E TI AR. DE KERANGAL  
Mouller an Eskobti.

DÉPÔT & VENTE EN GROS :  
*Librairie catholique J. SALAUN, Quimper.*

# TAOLENNOU AR MISSION

DISPLEGET

Gand ann Aotrou BALANANT, Beleg.

---

SALAUN, LEORIER E KEMPER  
56, ru Kereon.

---



KEMPER

MOULLET E TI DE KERANGAL  
Mouller an Eskobü.

## EUR GER DIVAR-BENN AN TAOLENNOU

Eur Mission h zo unan euz ar grasou kaera oufe ann Aotrou Doue rei d'eur barrez. N'euz ket par d'eur Mission evit dihuna ar Feiz, santelât ar re just hag ober d'ar bec'herien distrei ouz Done. Ann oll a oar ar vad great bete vreman enn hon Eskopti dre ar Missionou, rak diez e ve niveri ar re o deuz kavet enno ar peoc'h hag ann eûrzed.

Daoust a ne c'helpemp ket lavaret gant guirionez eo an taolennou o deuz great al loden vrasa euz al labour-ze ? Heb an taolennou-hiviziken n'euz Mission talvouduz ebel ; hag eaz eo gouzont penaaz e teu an taolennou a-benn da ober kement-se a vad. M'nt a reont dre zaoulagad an den beteg he spered, hag evelse, ar guirioneziou merket enno a jom skrivet dounoc'h enn he benn hag enn he galoun.

Karout a rafemp eta e c'helpet an taolennou chom atao dirak daoulagad an dud evit digas da zonj d'ezho euz ar Mission. Setu perag on euz great al leorik-man, ha displateget enhan pep taolen, e berr gomzou.

An taolennou n'int ket traou nevez, Great int bet-ha displateget da genta gant Mikael Le Nobletz, ganet e Plougerne, e Leoan, an 29 a viz Guengolo 1577, ha maro evel eur zant e Konk Leoun d'ann oad a 75 vloaz.

Implijet int bet abaoe gant kalz missionerien, hag atao o deuz great vad d'ann eneo.

En darn-vuia euz an taolennou ne velomp nemed eur penn hag eur galoun. Ar re-man a verk an diou loden a zo en den : ar c'horf hag ann ene. Dioc'h-pehini anezho e vez great brasa stad ? An taolennou a lavar d'ann oll var gement-man ar virionez hep damanti.



Eunn ene e stad a bec'hed marvel.

KENTA TAOLEN

**Ar pec'ched marvel.**

Setu aman eun den e stad a bec'ched marvel. Ne glask nemed he blijadur ha kement tra c'helpa maga he ioulou fall. Eur zell outhan a zo awalc'h evit guelet n'eo ket sonj ann Aotrou Doue 'zo enn he benn. Touellet eo he spered gand ar bed ; stad a ra euz he gorf, kement tra c'houlen a ro d'ezhan.

Ha sonjal a ra ive enn he ene ? Siouaz ! guelit pegen truezuz eo doare he ene paour ! Lagad ar goustians a zo du ha tenval : karout a rafe mouga mouez he goustians. Stereden ar Feiz ne lugern tamm : n'eo ket souezuz ! Ar Feiz, evit beza birvidik, a rank beza maget gand ann oberou mad. Hogen, petra velomp er galoun-man ? E kreiz, e ma an diaoul enn he za, hag en dro d'ezhan he vignounned brasa. Ar pañu a verk ann Ourgouil ; an tousk, ann Avaristed ; ar bouc'h, al Luxur ; ann aér-viber, ann Avi ; ar penmoc'h, ar Gourmandiz ; al leon, ar Goler ; ar velfeden, an Diegi. Kement tech fall zo a gav digemer mad e kaloun heman.

Penaoz eo kouezet enn eur stad ker spountuz ? Sellit e traon an daolen ; petra velit ? Eur millouer, kartou, gwer ha boutaillou, eur biniou..... Kollet eo bet gand al lorc'h, ar c'hoariou, ann hostaliriou hag an dansou.

Daoust hag ann Aotrou Doue a vez c'hoaz mad awalc'h evit ober eur zell a drugarez ouz cunn ene ken kaillaret ? Ia ; he Eal gardian a zo var he zaoulin o pedi evithan ; ar Spered-Santel din-dan furm eur goulm a dosta ive evit skuilla varnhan he c'hrasou, merket dre ann elvennou a veler o nijal en dro d'ar galoun, hep kaout digor.

Pec'her diskiant, skouarn vouzar a rez breman ; diouall da skuiza trugarez ann Aotrou Doue, enn eur ober evelse faë var he c'hrasou ; rag a-bred pe zivezad ar Barner en devezo he dro !



Eunn ene o tistrei ouz Doue dre spount rag ar maro  
ha rag ar varn.


EIL TAOLEN

### Ann Atrision.

Ar plac'h-man a ioa touellet he fenn deac'h gant follenteziou ar bed ; he c'haloun a ioa trec'het gand he ioulou fall ha saotret gand ar pec'hed. Hirio e deuz c'hoant chench buez. He fenn a zo modest, he daoulagad soublet; var he bizaj e veler eun dris-tidigez vraz. Al loened a dro kein evel pa vent o vont kuit ; an diaoul ive a zo eun troad d'ezhan er meaz euz ar galoun, tec'het a ra, en eur skrigna he zent. Evit doare, ez euz en em gavet aman eun dra benag ha ne blij ket kalz d'ezhan. Ann Eal gardian a zo ganthan, enn eun dourn, eur penn maro, hag, en dourn-all, eur c'hlaze lugernuz. E traon an daolen, ez euz eunn aneval hag a daol tan leiz he c'chinou. An traou-man a verk ar Maro, ar Varn hag ann Ifern.

An Eal gardian, dre drugarez evit ar plac'h-man, a deu da zigas sonj d'ezhi euz he finvezioù diveza. Ma teu ar maro d'he skei, eun Doue just he barno hag he s'lapo enn ifern ! Hou-man, daoust a ma'z eo brein he c'haloun gand ar pec'hed, a zelaou mouez he Eal gardian. Al lagad a zo anter-glozet : diskenn a ra e gweled he c'houstians. Ar stereden a zo skleroc'h ar Feiz a zibun hag a ziskouez d'ezhi ann ifern digor dindan he zreid. Neuze e sao spoutenn he c'haloun, hag e lavar : « Ne ma-oun ket var ann hent mad, distrei a rankan ! »

Ar c'hartou, ar gwer hag ar voutail a ruill d'an douar : dilezel a rai brema kement tra 'zo bet evithi penn-abek da bec'hi. Ar Spered-Santel a dosta muioc'h-mui ; eun neubeud grasou a zo dija ebarz ar galoun ; ne zaleint ket da zougen frouez. Kouls-goude, evit ober d'an diaoul diskregi da vad, ne vezoo ket awale'h d'ezhi kaout aoun, red'vezo ouspenn kovez.



Eunn ene distroet ouz Doue enn eur velet ar boan  
a ra d'ezhan ar pec'hed.

#### TREDE TAOLEN

#### Ar gwir Gontrision.

Arbec'herez-man, distro diavar ann hent fall, a zo mall ganthi en em zizamma euz pouez pounner ar pec'hed. Mont a ra da govez, ha goudeze e lavar outhi he-unan : « Breman va zonj a zo great : adaleg hirio, me reno eur vuez nevez. *Dixi, nunc capi...* »

Ann Eal gardian, laouen hag eūruz o velet eo troet ker mad breman he c'haloun, a beur-c'hraio al labour. Diskouez a ra d'ezhi eul leor hag eur grusifi. El leor, e vel merket he buez a-bez abaoe m'eo deuet he skiant d'ezhi : he ene zo goloet a bep seurt pec'he-jou ; stankoc'h int eget al louzeier fall enn eur park, Gälvet 'oa da gemer perz e joa hag eūrusded ann Env, mes siouaz ! roet e deuz ar maro d'he ene. Keit a ma vije chomet er stad-se, Baradoz ebet da c'hortoz ! Ann ifern, gand he boaniou skrijuz, a vije bet he loden evit ann eternite !

Var ar grusifi, e lenn ar garantez dispar en deuz bet ann Aotrou Doue evithi. Euz ar penn beteg an troad, korf Jezuz n'eo nemed eur gouli : ar c'high zo eat gand ar fouetou ; ann eskern zo dizolo..... skrijuz eo sellet outhan !

Evel ma teu ann heol da deuzi ar skourn, evelse ive karantez Hor Zalver a deu da denerât kaloun ar plac'h-man. Daelou 'zo enn he daoulagad, ha daelou kaeroc'h c'hoaz enn he c'haloun. Gouzout mad a ra breman eo hi e deuz staget Jezuz-Krist ouz ar Groaz ha dispennet he gorf santel. « Pardon, va Jezuz, emez'hi, pardoun !... Va zikourit da viret a-vreman dioc'h ar pec'hed ha da ober eur gwir binijen. »

Kerkent a m'e deuz bet ann absolen, an diaoulou a dec'h kuit. Ar Spered-Santel, gand he c'hrasou, a zisken enn he c'haloun ; ar Feiz a zo sklereat, ar goustians a zo sioul ; var evez e ma koulsgoude, rak koumoul an tentasionou a veler o sevel.



Eunn ene e gras Doue oc'h ober pinijen.

**Ar Binijen.**

Daou rumm dud hebken a ia d'ar Baradoz : ar re o deuz dalc'het ho c'haloun neat a bep pec'hed marvel adaleg ho badiziant, hag ar re a ra pinijen goude beza pec'het.

Rouez int, ann eneou santel a c'hounid ho c'hurunen dre eur vuez dibec'h ; stank avad, ha stank braz zoken, ar re a ia d'ar Baradoz dre hent ar Binijen : an den-man a zo unan anezho. Bet eo, epad pell amzer, eur pec'her diroll, hag eun devez, gras Doue e deuz digoret d'ezhan he zaoulagad ; distroet eo a galoun vad, pardouent eo bet. Breman n'en deuz ken c'hoant nemed paea da Zoue an dle stag ouz he bec'hejou, evit mont buanoc'h d'ar Baradoz.

Er galoun-man e veler Jezuz-Krist var ar groaz hag oll biviaschou ar Bassion : ar zonj euz poaniou Hor Zalver, renevez ganthan ken aliez a vech, dre he bec'hejou, a laka daelou enn he zaoulagad ha zoken enn he galoun.

Mes, netra semploc'h eget eunn ene nevez distroet ouz Doue : henvel eo ouz eur c'houlaouen a zo o paouez beza mouget, hag a grog buan ar flamm enni. He-man 'oar eo bresk evel eur gorzen, hag a ro d'he ene eur vagadurez iac'h ha nerzuz merket aman e traon an daolen :

Eur chapeled : pedi 'raio mintin ha noz ; devot 'vezo d'ar Verc'hez.

Eul leor : ann Aviel, Imitasion Jezuz-Krist, Buez ar Zent.

Eun dourn digor : aluzen a raio ervez he zanvez.


Eur pesk : dere'hel mad a raio breman d'ar iun ha d'ar vijil.

Eur skourjez : kastiza 'raio he gorf evit ober d'ezhan plega d'ann ene.

Eunn iliz : ne vanko Morse d'ann oferen ; mont a raio d'ar gousperou ha da oll ofisou ann Iliz.

Eur ster : gwalch'i 'raio aliez he ene e dour santel ar Binijen.

Eur groaz enn eur c'hornik distro : en em denna 'raio, eur vech ann amzer, pell dioc'h trouz ar bed evit sonjal da vad enn he zilividigez. Ma kendalc'h var ann hent-se, ann Eal a ziskouez d'ezhan ar Baradoz digemeret.



Eunn ene o tilezel he zeveriou hag o rei digor a-nevez  
d'an droug-sperejou.

PEMPED TAOLEN

### Ann ene o tistrei d'ar pec'hed.

Er Mission-man, ervez ma lavar ar c'hantik, e kafot oll ar peoc'h hag ann eüruzded ; iac'h ha laouen 'vezo hoc'h ene. Pegeit e chomoc'h e gras Doue ? Pelloc'h, me gred, eget ar plac'h a zo aman. Rodellet eo he bleo ganthi, eur gelc'hen berlez a zo en dro d'he gouzouk, c'hoarzin a ra : eun tammik fouge 'zo savet ennhi adarre. Karout a rafe breman ranna he c'haloun etre Doue hag ar bed.

Setu perag e velomp eul lagad d'ezhi serret kloz var gement a zell ouz he silvidigez, hag egile digor frank, ha troet varzu ar blijadur. Ebarz ar galou, Jesus-Krist ne ma mui var ar groaz, meur a dra a vank c'hoaz euz binviachou ar Basion, hag ar pez a jom a vezou mouget dizale gant moged an tentasianou.

A neubeudou e deuz ankounac'heat he Mission, ha dilezet he oberou a binjen. N'eo ket estoun e ve toc'hor he feiz, hag he c'houstians evel dall. Dizonjet e deuz ali mad ar Spered-Santel : « Qui spernit modica paulatim decidet, Ann hini a zisprij an traou dister, a gouezo neubeud a neubeud. »

Ann Eal gardian, eun dourm d'ezhan var ar galoun, a sko a gleiz hag a zeou evel pa ve kounnaret. Leac'h 'zo ; guelit ann oll loened distroet aman, eun diaoul gant peb hini anezho. An droug-spered, kaset kuit epad ar Mission, a zo eat da glask sez diaoul all krenvoc'h egethan. E maint aman var bordik ar galoun, ha koulsgoude ar plac'h-man ne ra van.

Eur hourc'hiz a velomp o sanka eur c'hleze enn he c'haloun, hag en tu all eur pez divalo o c'houlen digor ive. Ar re-man 'ioa bet penn-abek d'ezhi da goueza araog ar Mission ! Ma ne daol evez, hep dale e ma paket adarre enn ho rouejou, hag e vezou diesoc'h d'ezhi, en taol-man, en em dennia kuit ; rak seul-vui ma raio faë var grasou ar Spered-Santel, seul-dounoc'h e ielo ar pec'hed enn he c'haloun.



Eunn ene kouezet a-nevez er pec'had marvel dre m'en deuz dilezet  
he zeveriou kristen.

C'HOUEC'HVED TAOLEN

### Penaoz e kouezet adarre er pec'had.

Eur zoudard armet mad a zalc'ho penn d'he enebour ; ma lez a gitez he armou, e ma kollet. Setu petra en deuz great an denman. Goude eur Mission euz ar re vella, eo peget an diegi enhan ; dilezet en deuz a-nevez he zeveriou kristen. A volontez vad eo et var hent riskluz ar pec'had ; ne zaleo ket da gaout eur gwall lamm.

Renket brao eo he vleo ganthan, ha tronset e voustachou : ne zonj adarre nemed er blijadur hag e follenteziou ar bed. E traon an daolen, e veler eur millouer, kartotu ha dizou, eur voutail ba gwer, eur biniou : allaz ! heuliet en deuz kompagnunez fall, distroet eo d'ar c'hoariou, d'ann hostaliri ha d'an dansou !

Eul leor a zo ive, merket varnhan eur ger gallek « roman », da lavaret eo, leor brein. Dindan al leor, ez euz eun neubeud paper : kazettennou fall, marvad ! Breman ne vag mui he spered nemed gant louzdoni er giz-se. Beza z'euz ouzpenn eur maskl : c'hoant en dese da guzet he droiou ha da dremen evit eur c'christen mad.

Ha koulsgoude, pegen trist eo stad he ene ! An diaoul a zo azezet breman enn he galoun, evel eur roue var he drôn : en dro d'ezhan, he vevillion a zo dizoursi : er gear e maint. « *Fiant novissima pejora prioribus*, Kouezet eo ar pec'her izeloc'h eget biskoaz, » dre m'en deuz great faë var grasou ar Mission. Stereden ar feiz a zo du-pod, lagad ar goustians a zo evel maro : dre he wall-vuez en deuz mouget he feiz hag he goustians. He Eal gardian koulsgoude a bed evithan, ar Spered-Santel a jom c'hoaz enn he gichen da ginnig d'ezhan ar pardoun, ma kar distrei. Siouaz ! dallet neat eo gand ar pec'had : ne zelaou na mignoun, na tad, na mamm, na beleg, na Doue !... Ma varv er stad-se, n'en deuz nemed ifern da c'hortoz !!



Eun den skoet gand ar maro e stad a bec'hed marvel.

SEIZVED TAOLEN

**Maro ar pec'her.**


Trugarez ann Aotrou Doue a zo braz meurbed, eun termen e deuz koulsgoude. Hor Zalver he-unan eo hen lavar d'eomp : « Quæretis me et non invenietis, et in peccato moriemini : Va c'hlask a reot ha n'am c'hafot ket, hag e rankoc'h mervel enn ho pec'hed. » Ar c'homzou-man a zo deuet da vir evit an den a zo aman gourvezet var he vele.

Skouarn vouzar en deuz great da vouez trugarezuz Hor Zalver, disprijet en deuz he vadelez ! Setu deuet breman tro ann Aotrou Doue. Ar maro a sko ar pec'her, aliez siouaz ! pa zonj an neubeuta. Aman, var an daol ez euz kartou, eur voutail hag eur veren : *In peccato moriemini* : Mervel a raio e kreiz he blijadur. A zioe'h he vele, eun diaoul a zigor frank leor he vuez dirag he zaoulagad : penaouz lakat urz enn eur goustians ken zammet ? Biken ne c'hello ; re zivezad eo !

En dro d'ezhan ne jom nemed diaoulou hag amprevaned vil. He Eal mad a dro kein enn eur vouela : he leor d'ezhan a zo goullo ! M'en deuz great an den-man eun dra vad benag epad he vuez, en deuz siouaz ! kollet he oll veritou dre ar pec'hed marvel. Mervel a ra en dizesper, ha var he vele, raktal e vezoz barnet.

« Kea, ene milliget, eme Hor Zalver, kea d'an tan eternel ! » E traon an daolen, eo merket petra eo bet an den-man ; guelet a reomp : 1<sup>o</sup> eur bluen : skrivet en deuz leoriou, kazetennou, gwerziou fall, hag a bouez breman var he goustians ; 2<sup>o</sup> dizou : n'en em blije nemed er c'hoariou ; 3<sup>o</sup> eur c'bleze : roet en deuz taol ar maro da veur a ene dre he skridou, he gomzou lor, hag he vuez diroll ; eur maskl : e kuz marteze en deuz great he droiou ; troumpet en deuz an dud, ne droumplio ket ann Aotrou Doue, a lenn difazi e gweled ar goustians.

Pebeuz samm da vont dirag he Varner !



Eunn ene barnet ha stlapet enn Ifern.

## EIZVED TAOLEN

**Ar Varn hag ann Ifern.**

Setu maro ar pec'her e kreiz he yuez direiz : kerkent eo bet barnet. Petra n'euz douget gañthan dirag ar Barner ? He oberou, ha netra ken. Ha pe seurt oberou ? Pec'hejou, pe oberou great e stad a bec'hed hag heb talvoudegez dirak Doue.


El laez an daolen, ez euz eunn eal, eur valans ganthan enn he zourn ; a bep tu d'ezhan, eunn eal-all o tispaka eur rollad paper. Buez ar pec'her, merket aman, a zo pouezet e balans ar Varn : re skany eo kavet. He Eal mad, glac'haret-oll, a rank lavaret d'ezhan kenavo evit ato, ha derc'hel ganthan ar gurunen a dlie lakât var he benn. Barnet eo da viken !

Kerkent eunn Eal, gand he gleze lugernuz, a gas anezhan kuit, hag an diaoul a lamm varnhan evel eur bleiz kounnaret. « Kenavo Salver benniget, kenavo Guerc'hez Vari, kenavo oll zent ha sentezed, kenavo baradoz duduiz !... me ne c'hellin biken ho kwelet ! »

Disken a ra enn ifern, e kreiz eur mor tan. Bourrevet eo ann oll skianchou en deuz pec'hed ganthro : he zaoulagad, he c'hinou, he ziskouarn. En dro d'ezhan diaoulou, aëret, amprevanet euz ar re lousa ; he vele 'zo glaou beo, he vagadurez flammou.

Karet a rafe distrei var an douar da ober pinijen..., re zivezad ! Doriou ann ifern, serret varnhan, ne zigorint biken !...

Sonjit aliez enn ifern. Ne c'hortozit ket heur ho maro evit distrei ouz Doue. Epad ar Mission-man, gwalc'hit mad hoc'h ene. Breman eo d'eoc'h teuler evez, gand aoun na deufé ann Aotrou Doue da skuiza ganeoe'h.



An daou hent digor dirag pep kristen : hent ar Baradoz  
hag hent ann Ifern.

### Hent ar Zilvidigez.

An daolen-man a ziskouez d'eomp ann hent en deuz heuliet an den daonet, or beuz guelet en ifern.

Aman ez euz eur menez huel hag eur groaz lugernuz azioc'h d'ezhan. Ar menez-man a verk buez an den o vale etrezek ann Eternite. Ar vuez a zo eur veach hir evit lod, berr evit lod-all : ne c'heller eana nemed e penn ann hent.

Daou hent a zo digor dirazomp : hent ann Ifern hag hent ar Baradoz. Hent ann Ifern, frank, ledan, kempennet kaer : a bep seurt tud a vale dreizhan : enn eun tu, eur bourc'hiz, en tu all, eur c'houeriad. Ne zaleint ket da gaout lamm, rag an diaoul a veler ouz ho gortoz. Hent ar Baradoz, striz, rust, goloet a rrez hag a spern : gwir eo komz hor Zalver : « *Regnum caelorum vim patitur, et violenti rapiunt illud.* » Rouantelez ann Env a vez roet d'ar re a boanio stard hag a vezoo dizamant ouz ho c'horf. » Kouls-goude mar d'eo moan da genta, goude-ze e teu da ledanat. Ia, ar pec'her nevez distroet ouz Doue a gay diez da genta heulia he c'hourc'hennou ; mes eur zell var ar groaz a ro d'ezhan nerzkaloun, gras Doue a skanya ar zammt « *Jugum meum suave est et onus meum leve.* »

An teir vaouez 'zo e traon an daolen n'o deuz ket great ho zonj c'hoaz ; pe, da vihana, eun dra benag a vir outho da gemeret hent ar Baradoz ; re stag eo ho c'haloun ouz traou ar bed, ha n'o deuz ket a nerz awalc'h evit terri liammou ar pec'hed.

Eun den a velomp o pignat : bolontez vad en deuz, sellet a ra eeün dirazhan. Hueloc'h, eunn itron, goude beza great eur pennadik hent, a deu da fall-galouini pa vel dirazhi pazennou ar zantelez.

Unan all, en em gavet e penn he beac'h, a zo var he daoulin dirag ar groaz. Rust eo bet, ann hent, n'euz forz ! hent ar C'halvar a zo ive hent ar Baradoz !



Eunn ene o kenderc'hel var ann hent mad.

## DEKVED TAOLEN

**Penaoz kenderc'hel var hent ar baradoz.**

*« An-hini a gendalc'ho var ann hent mad beteg ar maro a vezosalvet. »* — Setu aze ar c'homzou a lennomp var ar rollad paper a zispleg ann Eal dirak daoulagad ar plac'h-man. Abaoue he Mission, hou-man e deuz kemeret evit mad hent ar Baradoz. Skuizder, poan, pinijen, netra ne ra aoun d'ezhi. Gouzout mad a ra e tosta bemdez termen he beach, ha setu perag eo stankoc'h c'hoaz he oberou mad ha rustoc'h he finjen.

Er bevare taolen, ann oberou a binijen a zo e meaz ar galoun : aman e maint ebarz. Ia, derc'hel a ra startoc'h d'ezho, rak gwelet a ra n'euz netra koulz hag ar binijen evit pellât an dentasion ha rei nerz d'ar galoun.

Ar goustians zo digor frank he lagad : direbech eo, ar peoc'h zo enni. Ar stereden a zo lugernuz : ar Feiz, breman maget gant kement-all a oberou mad, a zo beo-huezeg. Hou-man a ra aliez Actou a Feiz. Ar grusifi a zo e kreiz he c'haloun : Hor Zalver Jezuz-Krist eo ar mestr aman, hag aliez hed an deiz, e vezot euz he c'harantez birvidik.

Eun dra'zo aman n'or beuz ket gwelet c'hoaz : eunn aoter ; mont a raio aliez da c'houlen sikour digant Jezuz ebarz ar gomunion ; d'ann oferen ne vanko Morse mui, var ar zizun zoken, ma chom amzer ganthi.

Mevellien an diaoul o defe c'hoant da zevel ho fri c'hoaz varzu ar galoun-man, mes ho mestr, o tec'het kuit gand he forc'h hag he hual, a c'halv anezho var he lerc'h : « Deomp d'ar gear, emezhan, aman n'or beuz netra ken da ober, koll a reomp hon amzer ! »



Eunn ene e stad a c'hras galvet da vont d'ar Baradoz.

UNNEKVED TAOLEN

**Maro eur Zant.**

E ma digouezet an den just e penn he veach. Poaniet en deuz stard da choumid he gurunen, pinijen en deuz great d'hebec'hejou : Doue breman 'zo o vont d'en digoll. Astennet eo var he vele diveza, eur sklerijen gaer a zisken euz ann Env var he dal, hag a zigas beteg enhan evel eur skeuden euz ann eüruzded 'zo ouz he c'hortoz.

Var an daol, e kichen he vele, ez euz eur groaz ha diouc'houlouuen benniget. Ar belek a ro d'ezhan sakramant an Nouen, ha dre ma ra sin ar groaz gand ann oleo zakr var he skianchou, ann Eal-mad a ro eun taol pluen var gement pec'hed a c'helpenza great, dre zempladurez, epad he vuez.

Sant Mikel, gand he gleze, a gas kuit an diaoul ; aman n'euz netra evithan : distrei a ranko d'an ifern gand he leor goulonnag ann eteo a vez ganthan o c'houeza tan ar pec'hed er c'halonou. Ar vugaligou, gant ho mamm, 'zo daoulinet etal ar gwele, hag an tad a zav he zourn evit rei dezho he vennoz diveza. Kimiada 'ra heb rann-galoun, rag Eal ar maro mad a ziskouez d'ezhan, ar baradoz digor a-zioc'h d'he benn. Ann Elez a nij endro d'ezhan, mall ganthro digemeret he ene evit hen dougen var ho diouaskell aour beteg tron ann Aotrou Doue.

Sant Per, alc'houez ar Baradoz enn he zourn, a ziskouez d'ezhan ar plas 'zo merket evithan e palez an Dreindet ; eno e vezou eüruz da viken, o kana meuleudi da Zoue.

Ra zeuio an daolen-man da lakât esperans e kalonou ar bec'herien, o deuz great ho Mission. Doue, epad an deveziou santel-man, en deuz roet eun taol pluen var ho buez tremenet : d'ezho breman da boania evit gounid kurunen ar zent.



Ann eneou oc'h ober pinijen e tan ar Purkator.

## DAOUZEKVED TAOLEN

**Ar Purkator.**

A c'hoant o c'heuz-hu da vont d'ar Baradoz var eeūn ? Grit pinijen hervez an niver euz ho pec'hejou. Rak, goude ann absolen e chom c'hoaz dle da baea da justis Doue, pe var an douar, pe er Purkator dre boaniou krisoc'h. Setu ar pez a verk an daolen-man.

Gwelet a reomp aman, enn eur puns leun a dan, kalz a dud n'int ket diskarg awalc'h c'hoaz evit mont d'ar Baradoz. Ann Elez a zisken beteg ennho : kas a reont gantho ar re o deuz peure'hreat ho finjen, hag ar re o deuz tud vad var an douar da bedi evitho, da ziverrât ho foaniou dre ann oferennou hag ar zerzhichou a lakont evitho. Hor Zalver Jezuz-Krist, azezet var eun tron kaer, a zo ganthan eur gurunen enn he zourn. En tu kleiz d'ezhan, e ma ar Verc'hez Vari, digor he divreac'h evit digemeret he bugale. Enn ho c'hichen, ann Elez a gan kantikou ar Baradoz. En tu deou, e velomp daou zen koz hag eur bugelik iaouank. An tad koz hag ar vam goz n'int ket chomet pell e tan ar Purkator. Lezet o deuz var ho lerc'h, evit doare, bugale vad hag o deuz pedet evitho ; rag e maint breman er Baradoz.

Ar bugelik-man a zo eun elik bihan, bet skoet gand ar maroaraok beza saotret saē venn he vadiziant. Gwelet a ra he vamm erru d'ar Baradoz : pebeuz joa evithan ! Pebeuz laouenedigez ive evit ar vamm, pa c'hello bremaik starda var he c'haloun he elik muia karet, e devoa skullet kement a zaelou varnhan !

Araok ma vezoz Kloz ar Mission, kasit, en han' Doue, an tanva euz ar grasou o peuz resevet beteg eneou karet ho tud, zo c'hoaz martez e tan ar Purkator.

Truez ouz ann Anaoun, evit ma vezoz truez ouzomp ive goude hor maro !

---

Kemper, moullet e ti de Kerangal.

